

ТӘУЕЛСІЗ ЕЛДІҢ ЕРТЕҢІ ЖАРҚЫН



Тәуелсіздік. Егемендік. Еркіндік. Ата-баба қанымен келген осынау тәңір тартуының құны тым қымбат. Егемендік пен еркіндіктің баянды тұтқасын ұстайтын жастар үшін бұл – аманат. Тәуелсіздікті ұрпақтан-ұрпаққа жалғау, мәртебесін асқақтату — біздің еншімізде. Ол үшін қазақ жастарының

кезі ашық, көкірегі ояу, ғылым-білімге жаны құмар болмағы керек. Ал әрбір жас «Мәңгілік Ел – Қазақстанның болашағы менің қолымда!» деген ұранды ұстанса, білім мен ғылымға құштар болуы анық. Сондай-ақ Елбасымыз Н.Назарбаевтың «Бұл заман –білекке емес, білімге сенетін заман. Заманауи әлемде елдің қуаты, ең алдымен, білім мен ғылымда болатын уақытқа келдік», - деп атап өтуі, болашағымыз үшін білімнің маңызын нақты жеткізіп отыр.

Қазір әлем өзгерген. Жаһандану дәуірі тек ілгері ұмтылуды қажет етеді. Осы орайда адам ресурстарының рөлі артып отыр. Бұл білім мазмұнын жаңартуды, дамыған елдердің прогрессивті тәжірибесін игере отырып мамандар даярлайу сапасын жетілдірудің қажет екендігін көрсетеді. Ал Тәуелсіздік алғалы бері жыл сайын жүргізіліп,

білім жүйесіне енгізіліп отырған реформалар біздің болашағымызға салынып жатқан даңғыл жол деп айтуымызға болады.

Бүгінгі таңда отандық ғылым дамудың даңғыл жолына түсіп келеді. Оған дәлел – ғылым сапасын жақсарту жөніндегі шараларды іске асыру нәтижесінде ғылымды қаржыландырудың еселеп ұлғайғандығы. Әрі жыл сайын елімізде ғалымдардың еңбегін қолдау, жас ғалымдарды ғылым саласына тарту мақсатында дарынды жастардың бастамаларын қолдауға бағытталған жобаларға қаржы бөліп, конкурстар, форумдар ұйымдастырылуда. Жалпы отандық ғылымның дамуына барлық деңгейдегі білім беру мазмұнын жаңғыртудың әсері зор екендігі белгілі. Себебі, қай мемлекеттің болсын даму жолы, яғни экономикалық-әлеуметтік жағдайына тікелей апарар жол – сол елдің білімінің дамуы болып табылады.

Білімді ел – білікті ел. Тәуелсіздік – Қазақстан білімін әлемдік сұранысқа жауап бере алатын білімді, білікті адам капиталын қалыптастырып отыр. Оқуы озған, ғылымы дамыған ел ғана өркениетке жете алады. Ұлы Абай «Адам баласы адам баласынан ақыл, ғылым, ар, мінез деген нәрселермен озады» деген. Яғни оқу-білімге құлшынған, ізденімпаз әр жастың дамуы, қоғам деңгейінің сатылып өсуі.

Шындығында Тәуелсіздік кезеңінде Елбасымыздың салиқалы саясатының арқасында еліміз әр салада толайым табыстарға қол жеткізді. Мұндай тың серпін білім саласында да анық байқалады. Тұңғыш Президентіміздің бастамашылдығымен қолға алынған «Болашақ» бағдарламасы арқылы көптеген зерделі жастарымыз әлемнің жетекші жоғары оқу орындарында білім алып, бүінде Тәуелсіз еліміздің қарыштап дамуы үшін қызмет етіп жатса, «Мұғалім мәртебесі туралы»

заң да ұстаз қауымның қоғамдағы рөлін мейлінше көтеріп, білім саласында жүргізілген реформалар өзінің оң нәтижесін беріп келеді. Әрине, егемен елдің ұлтжанды ұрпағын қалыптастыруда, жаңа қазақстандық патриотизмді ұлықтауда, қуатты Қазақстанды жер-жаһанға танымал етуде, тәуелсіз елді түлетуге, өңірлерді өркендетуде Елбасымыздың қосқан үлесі қомақты-ақ. Ендеше Елбасымыздың өзі айтқандай, Тәуелсіз Қазақстанымыздың терезесін басқалармен тең ету бәріміздің де басты борышымыз болуы керек.

Шымкент қаласында өткізіліп жатқан түрлі игі шараларда да Тәуелсіздік тағылымы ұдайы насихатталуда. Бұл үрдістің өз жалғасын табатыны анық.

**Г.ГУСЕМБЕКОВА,
М.Әуезов атындағы ОҚУ
колледжінің оқытушысы.**